

**МОНГОЛ УЛСЫН ХУУЛЬ**

2019 оны...дугаар сарын  
.....-ны өдөр

Улаанбаатар хот

**ӨРСӨЛДӨӨНИЙ ТУХАЙ  
(Шинэчилсэн найруулга)**

**НЭГДҮГЭЭР БҮЛЭГ  
НИЙТЛЭГ ҮНДЭСЛЭЛ**

**1 дүгээр зүйл. Хуулийн зорилт**

1.1.Энэ хуулийн зорилт нь аж ахуй эрхлэгч зах зээлд шударгаар өрсөлдөх нөхцөлийг бүрдүүлэх, өрсөлдөөнийг хамгаалах, дэмжих, өрсөлдөөнд харш аливаа үйл ажиллагаанаас урьдчилан сэргийлэх, хориглон хязгаарлах, өрсөлдөөнийг зохицуулах байгууллагын эрх зүйн байдлыг тодорхойлж, тэдгээртэй холбогдсон харилцааг зохицуулахад оршино.

**2 дугаар зүйл. Өрсөлдөөний тухай хууль тогтоомж**

2.1.Өрсөлдөөний тухай хууль тогтоомж нь Монгол Улсын Үндсэн хууль, Иргэний хууль, энэ хууль болон эдгээртэй нийцүүлэн гаргасан хууль тогтоомжийн бусад актаас бүрдэнэ.

2.2.Монгол Улсын олон улсын гэрээнд энэ хуульд зааснаас өөрөөр заасан бол олон улсын гэрээний заалтыг дагаж мөрдөнө.

**3 дугаар зүйл. Хуулийн үйлчлэх хүрээ**

3.1.Энэ хуулийн үйлчлэлд захиргааны байгууллагын зах зээлийн харилцаанд чиглэсэн үйлдэл, үйл ажиллагаа, шийдвэр, эс үйлдэхүй болон аж ахуй эрхлэгч, зах зээлийн харилцаанд хамаарал бүхий шийдвэр гаргаж, үйл ажиллагаа явуулж байгаа ашгийн төлөө бус хуулийн этгээд, хуулийн этгээдийн эрхгүй байгууллага хамаарна.

3.2.Аж ахуй эрхлэгч Монгол Улсын хилийн гадна энэ хуулиар хориглосон үйл ажиллагааг явуулж, тэр нь Монгол Улсын зах зээлд нөлөөлсөн нь тогтоогдвол энэ хууль нэгэн адил үйлчилнэ.

**4 дүгээр зүйл. Хуулийн нэр томъёоны тодорхойлолт**

4.1.Энэ хуульд хэрэглэсэн дараахь нэр томъёог дор дурдсан утгаар ойлгоно:

4.1.1.“бараа, бүтээгдэхүүн” гэж зах зээлд худалдах, солилцох, эргэлтийн өөр нэг хэлбэрт оруулах зориулалттай бүх төрлийн бараа, ажил, үйлчилгээ, эд юмс, эрхийг;

4.1.2.“зах зээл” гэж тодорхой бараа, бүтээгдэхүүний нийлүүлэлт, борлуулалт явагдаж байгаа орон зай, нутаг дэвсгэрийг;

4.1.3.“аж ахуй эрхлэгч” гэж аж ахуйн үйл ажиллагаа эрхэлж байгаа ашгийн төлөө хуулийн этгээд, хуулийн этгээдийн эрхгүй байгууллага, хувь хүнийг;

4.1.4.“Захиргааны байгууллага” гэж Захиргааны ерөнхий хуулийн 5 дугаар зүйлд заасныг;

4.1.5.“өрсөлдөгч” гэж тухайн төрлийн бараа, бүтээгдэхүүний зах зээлд үйл ажиллагаа явуулж байгаа аж ахуй эрхлэгчдийг;

4.1.6.“Харилцан хамаарал бүхий этгээд” гэж тухайн аж ахуй эрхлэгчтэй Аж ахуйн нэгжийн орлогын албан татварын тухай хуулийн 6.1.1-6.1.3-т заасан харилцаа бүхий аж ахуй эрхлэгчийг;

4.1.7.“бараа, бүтээгдэхүүний хүрээ” гэж харилцан орлох бараа, бүтээгдэхүүний бүлгийг;

4.1.8.“зах зээлийн газар зүйн хил хязгаар” гэж тухайн бараа, бүтээгдэхүүнийг өөр зах зээлээс худалдан авах боломж нь эдийн засгийн хувьд хязгаарлагдмал нутаг дэвсгэр, орон зайг;

4.1.9.“зах зээлийн төвлөрөл” гэж зах зээлд аж ахуй эрхлэгчийн дангаараа буюу бусад этгээдтэй хамтран, эсхүл харилцан хамаарал бүхий этгээдийн борлуулж байгаа тухайн бараа, бүтээгдэхүүний эзлэх хувийг;

4.1.10.“зах зээлийн хүч” гэж аж ахуй эрхлэгчийн тухайн бараа, бүтээгдэхүүний зах зээлд нөлөө үзүүлэх чадварыг.

**5 дугаар зүйл. Зүй ёсны монополь болон давамгай байдалтай аж ахуй эрхлэгч**

5.1.Өрсөлдөгч аж ахуй эрхлэгч эдийн засаг, техник, технологийн аль нэгнийх нь хувьд нэвтрэн орох боломжгүй, эсхүл хязгаарлагдмал зах зээлд дангаараа үйл ажиллагаа явуулж байгаа аж ахуй эрхлэгчийг зүй ёсны монополь байдалтайд тооцно.

5.2.Аж ахуй эрхлэгч тодорхой бараа, бүтээгдэхүүний зах зээлд дангаараа эсхүл бусад этгээдтэй хамтран, эсхүл харилцан хамаарал бүхий этгээдүүд үйлдвэрлэл, борлуулалт, худалдан авалтын аль нэгийг нь гуравны нэг буюу түүнээс дээш хувийг эзэлж байвал давамгай байдалтай аж ахуй эрхлэгчид тооцно.

5.3.Энэ хуулийн 5.2-т заасан хувьд хүрээгүй ч зах зээлийн үнэ, өрсөлдөөн, борлуулалт, нийлүүлэлт, худалдан авалт зэрэгт нөлөө үзүүлэх чадвартай аж ахуй эрхлэгчийг бараа, бүтээгдэхүүний хүрээ, зах зээлийн газар зүйн хил хязгаар, зах зээлийн төвлөрөл, зах зээлийн хүч зэргийн аль нэгийг үндэслэн давамгай байдалтайд тооцож болно.

## **ХОЁРДУГААР БҮЛЭГ**

### **ӨРСӨЛДӨӨНИЙ ЗОХИЦУУЛАЛТ**

**6 дугаар зүйл. Зүй ёсны монополь байдалтай аж ахуй эрхлэгчийн үйл ажиллагааг зохицуулах**

6.1.Шударга өрсөлдөөн, хэрэглэгчийн хороо нь зүй ёсны монополь байдалтай аж ахуй эрхлэгчийн үйл ажиллагаанд дараахь зохицуулалт хийнэ:

6.1.1.зах зээлд нийлүүлж байгаа тухайн бараа, бүтээгдэхүүний тоо, хэмжээний өөрчлөлтийг хүчин чадалтай нь уялдуулан хянан зохицуулах;

6.1.2.бодит зардлыг нь харгалзан тухайн бараа, бүтээгдэхүүнийг борлуулах үнийн өөрчлөлтийг хянан зөвшөөрөл олгох;

6.2.Зүй ёсны монополь байдалтай аж ахуй эрхлэгч энэ хуулийн 7.1-д заасан үйл ажиллагаа явуулахыг хориглоно.

## **7 дугаар зүйл. Давамгай байдлаа хууль бусаар ашиглах**

7.1.Аж ахуй эрхлэгч зах зээлд давамгай байдалтай байхдаа дараахь үйл ажиллагаа явуулахыг хориглоно:

7.1.1.зохиомлоор тухайн бараа, бүтээгдэхүүний хомсдол бий болгох, тэдгээрийн үйлдвэрлэл, борлуулалтыг зогсоох, хэмжээг хязгаарлах;

7.1.2.аж ахуй эрхлэгчээс борлуулалтын нэмэлт нөхцөлийг шаардах, зах зээлд ижил төрлийн бараа бүтээгдэхүүнийг ялгавартай үнээр борлуулах, борлуулалт хийхээс үндэслэлгүйгээр татгалзах.

7.1.3.өрсөлдөөнийг хязгаарлах аливаа нөхцөл үүсгэн бараа, бүтээгдэхүүнээ бодит зардлаас доогуур үнээр борлуулах;

7.1.4.эдийн засгийн болон техникийн бодит үндэслэлгүйгээр бусадтай аж ахуйн харилцаа тогтоохоос татгалзах, үндэслэлгүйгээр шалгуур үзүүлэлт тогтоох;

7.1.5.тухайн бараа, бүтээгдэхүүнийг дахин борлуулах үнэ, нутаг дэвсгэрийг тогтоож өгөх;

7.1.6.өөрийн бараа, бүтээгдэхүүнийг борлуулахдаа өрсөлдөгчийн бараа бүтээгдэхүүнийг худалдан авахгүй байх болзол тавих;

7.1.7.тухайн бараа, бүтээгдэхүүний үйлдвэрлэл, борлуулалтыг бууруулахад хүргэж болох, эсхүл аж ахуй эрхлэгчийг алдагдалд оруулж болзошгүй нөхцөлөөр уг бараа бүтээгдэхүүнийг өөртөө худалдахыг бусдаас шаардах;

7.1.8.аж ахуй эрхлэгчээс санхүүгийн хэрэгсэл, эд хөрөнгө, тэдгээрийн эрх, ажиллах хүч зэргийг өөртөө шилжүүлэхийг үндэслэлгүйгээр шаардах;

7.1.9.өрсөлдөгчөө өөртөө нэгтгэх, нийлүүлэх, хуваах, тусгаарлах замаар өөрчлөн байгуулахыг шаардах;

7.1.10.тодорхой төрлийн бараа, бүтээгдэхүүний талаар хийж байгаа гэрээ, хэлэлцээрт гэрээний зүйлд хамаарахгүй эсхүл өрсөлдөөнд сөргөөр нөлөөлөх нөхцөлийг гэрээнд тусгахыг тулган шаардах, бусад оролцогчид ялгавартай нөхцөл тавих;

7.1.11.бараа, бүтээгдэхүүн борлуулахдаа өрсөлдөөнийг хязгаарлах болон бусад аж ахуй эрхлэгчийн хэвийн үйл ажиллагаа, зах зээлд эзлэх хувь, борлуулалт зэргийн аль нэгд сөргөөр нөлөөлөх буюу нөлөөлж болзошгүй нөхцөлийг үүсгэн иж бүрдэлд ороогүй бараа бүтээгдэхүүн дагалдуулах;

7.2.Энэ хуулийн 7.1.1-7.1.11-д заасныг зөрчсөн этгээдийн зөрчлийг шийдвэрлэхэд тухайн аж ахуй эрхлэгчийг холбогдох зах зээлд давамгайл байдалтай аж ахуй эрхлэгчээр урьдчилан тогтоосон байхыг шаардахгүй. Хяналт шалгалт хийх, зөрчлийг шалгах явцдаа уг зөрчил үйлдэгдсэн тухайн жилд уг аж ахуй эрхлэгч холбогдох зах зээлд давамгайл байдалтай байсан эсэхийг тогтооно.

**8 дугаар зүйл. Аж ахуй эрхлэгч нэгдэх, нийлэх замаар өөрчлөн байгуулагдах, бусад аж ахуй эрхлэгч хуулийн этгээдийг худалдан авах, шилжүүлэн авах**

8.1.Аж ахуй эрхлэгч нэгдэх, нийлэх замаар өөрчлөн байгуулагдах, бусад аж ахуй эрхлэгч хуулийн этгээдийг худалдан авах, шилжүүлэн авах талаар хийх энэ хуулийн 8.2-т заасан зохицуулалтад хамаарах этгээдийн борлуулалтын орлогын босго хэмжээг улсын эдийн засгийн нөхцөл байдлыг харгалзан 2 жил тутамд Засгийн газар тогтооно.

8.2.Аж ахуй эрхлэгч бусад аж ахуй эрхлэгчтэй нэгдэх, нийлэх замаар өөрчлөн байгуулагдах, бусад аж ахуй эрхлэгч хуулийн этгээдийн хувьцааг худалдан авсан, эсхүл бусад хэлбэрээр шилжүүлэн авсаны үр дүнд Компанийн тухай хуульд заасан хяналтын багцыг эзэмших, эсхүл дангаар болон нэгдмэл сонирхолтой этгээдийн хамт хамгийн их энгийн хувьцаа эзэмших тохиолдолд өөрчлөн байгуулагдаж байгаа этгээдийн аль нэг нь, эсхүл хувьцаа худалдах, худалдан авах, шилжүүлж байгаа хуулийн этгээдийн аль нэгнийх нь борлуулалтын орлого энэ хуулийн 8.1-д заасан босго хэмжээнээс дээш байвал Шударга өрсөлдөөн, хэрэглэгчийн хорооноос урьдчилан зөвшөөрөл авна.

8.3.Энэ хуулийн 8.2-т заасан зөвшөөрлийг аваагүй бол энэ талаар хийгдсэн хэлцэл хүчин төгөлдөр бус байна.

8.4.Шударга өрсөлдөөн, хэрэглэгчийн хороо энэ хуулийн 8.2-т заасан зөвшөөрөл хүссэн хүсэлтийг хүлээн авснаас хойш 30 хоногийн дотор хянаж зөвшөөрсөн, эсхүл татгалзсан дүгнэлт гаргана. Энэ хугацааг 30 хүртэл хоногоор сунгаж болох бөгөөд шаардлагатай тохиолдолд нэмэлт мэдээлэл гаргуулан авч болно.

8.5.Шударга өрсөлдөөн, хэрэглэгчийн хороо энэ хуулийн 8.2-т заасан зөвшөөрөл хүссэн хүсэлтийг хянаж үзээд холбогдох зах зээлд давамгайл байдал үүссэн, аж ахуй эрхлэгчийн давамгайл байдал нэмэгдсэн, зах зээлийн төвлөрөл, зах зээлийн хүч нэмэгдсэн зэргийн аль нэгний үр дүнд өрсөлдөөнийг хязгаарлах нөхцөл бүрдэнэ гэж үзвэл татгалзсан дүгнэлт гаргана. Дүгнэлт гаргах журмыг Засгийн газар батална.

8.6.Шударга өрсөлдөөн, хэрэглэгчийн хорооны татгалзсан дүгнэлт нь аж ахуй эрхлэгчийн өөрчлөн байгуулалт, хувьцаа худалдан авалт, шилжүүлэлтийн талаархи өөрчлөлтийг улсын бүртгэлд бүртгэхгүй байх үндэслэл болох бөгөөд өмнө хийгдсэн улсын бүртгэлийг хүчингүй болгох үндэслэл болно.

**9 дүгээр зүйл. Өрсөлдөгч аж ахуй эрхлэгчийн удирдлага, эрх бүхий албан тушаалд ажиллахыг хориглох**

9.1. Аж ахуй эрхлэгчийн эрх бүхий албан тушаалтан, удирдлага өрсөлдөгч аж ахуй эрхлэгчийн удирдлага, эрх бүхий албан тушаалтнаар хавсран ажиллахыг хориглоно.

**10 дугаар зүйл. Аж ахуй эрхлэгчийг хуваах, тусгаарлах**

10.1. Энэ хуулийн 7.1-д заасан хориглосон үйл ажиллагааг хоёр болон түүнээс дээш удаа явуулж шийтгэл хүлээж байсан ч дахин зөрчил үйлдсэн нь тогтоогдвол тухайн аж ахуй эрхлэгч хуулийн этгээдийг хуваах, тусгаарлах замаар өөрчлөн байгуулах арга хэмжээг албадан хэрэгжүүлэх замаар холбогдох зах зээл дэх давамгайл байдлыг арилгана.

10.2. Энэ хуулийн 10.1-д заасан хуваах, тусгаарлах замаар өөрчлөн байгуулах арга хэмжээг хэрэгжүүлэх асуудлыг Шударга өрсөлдөөн, хэрэглэгчийн хорооны нэхэмжлэлийг үндэслэн шүүх шийдвэрлэнэ.

10.3. Энэ хуулийн 10.1-д заасны дагуу аж ахуй эрхлэгч хуулийн этгээдийг хуваах, тусгаарлах замаар өөрчлөн байгуулах арга хэмжээг хэрэгжүүлэх үндэслэлтэй гэж шүүх үзвэл энэ талаар гаргах шийдвэртээ тухайн аж ахуй эрхлэгчийг хэрхэн хуваах, тусгаарлахыг тодорхой зааж өгнө.

**11 дүгээр зүйл. Өрсөлдөөнийг хязгаарлахад чиглэсэн гэрээ, хэлцлийг хориглох**

11.1. Аж ахуй эрхлэгчийн байгуулсан дор дурдсан агуулга бүхий гэрээ, хэлцэл нь өрсөлдөөнийг хязгаарлах тул хориглох ба хэлцэл нь хүчин төгөлдөр бус байна:

11.1.1. бараа, бүтээгдэхүүний үнийг ямар нэг хэлбэрээр хэлцэн тогтоосон;

11.1.2. зах зээлийг нутаг дэвсгэр, үйлдвэрлэл, үйлчилгээ, борлуулалт, барааны нэр, төрөл, худалдан авагчаар хуваарилсан;

11.1.3. бараа, бүтээгдэхүүний үйлдвэрлэл, нийлүүлэлт, борлуулалт, ачилт болон тээвэрлэлт, зах зээлд нэвтрэн орох боломж, хөрөнгө оруулалт, техник, технологийн шинэчлэлийг хязгаарласан;

11.1.4. уралдаант шалгаруулалт, дуудлага худалдаа болон төрийн болон орон нутгийн өмчийн хөрөнгөөр бараа, ажил, үйлчилгээ худалдан авах ажиллагаанд оролцохдоо бараа, бүтээгдэхүүний үнэ болон бусад нөхцөл, шалгуурыг урьдчилан тохиролцсон.

11.2. Аж ахуй эрхлэгчдийн хоорондын дараахь гэрээ, хэлцэл нь өрсөлдөөнийг хязгаарлах нөхцөлийг бүрдүүлсэн буюу бүрдүүлж болзошгүй нь тогтоогдсон бол хориглох ба энэ хэлцэл нь хүчин төгөлдөр бус байна:

11.2.1. хууль, эдийн засгийн болон технологийн үндэслэлгүйгээр аж ахуйн харилцаа тогтоохоос татгалзсан;

11.2.2.бараа, бүтээгдэхүүнийг гуравдагч этгээдэд худалдах, худалдан авахыг хязгаарласан;

11.2.3.өрсөлдөөнд чухал ач холбогдол бүхий хэлцэл, тохиролцооноос хамтран татгалзсан;

11.2.4.аж ахуйг эрхлэх зорилгоор аль нэг байгууллагад гишүүнээр элсэхэд нь өрсөлдөгчид саад учруулсан.

11.3.Энэ хуулийн 11.2-т заасан гэрээ, хэлцэл нь өрсөлдөөнийг хязгаарлах нөхцөлийг бүрдүүлсэн буюу бүрдүүлж болзошгүйг тогтоох ажиллагааны журмыг Засгийн газар батална.

11.4.Энэ хуулийн 11.1, 11.2-т заасан гэрээ, хэлцлийг хийсэн аж ахуй эрхлэгчийн үйлдэл, үйл ажиллагааг дагаж гүйцэтгэсэн бол уг гэрээ, хэлцлийг дэмжиж оролцсонд тооцон хориглох ба энэ хуулийн 11.1, 11.2-т заасныг зөрчсөн аж ахуй эрхлэгчтэй нэгэн адил авч үзнэ.

11.5.Энэ хуулийн 11.1, 11.2-т заасан гэрээ, хэлцлийн талаарх бодит мэдээллийг холбогдох нотлох баримтын хамт ирүүлсэн этгээдийн уг мэдээлэл, баримтыг Зөрчил шалган шийдвэрлэх тухай хуулийн 6.2 дугаар зүйлийн 7 дахь хэсэгт заасны дагуу төлбөртэйгээр авч болно.

## **12 дугаар зүйл. Өрсөлдөөнийг хязгаарлах бусад үйл ажиллагаа**

12.1.Аж ахуй эрхлэгчийн дараахь үйл ажиллагаа өрсөлдөөнд харшлах тул хориглоно:

12.1.1.өрсөлдөгчийн болон түүний бараа, бүтээгдэхүүний нэр хүндийг гутаах, эсхүл өрсөлдөгчөө алдагдалд оруулж болохуйц худал, зөрүүтэй буюу гуйвуулсан мэдээ тараах;

12.1.2.өөрийн бараа, бүтээгдэхүүний талаар худал, зөрүүтэй мэдээлэх, эсхүл үнэн байдлыг гуйвуулах зэргээр бусдыг төөрөгдүүлэх;

12.1.3.өрсөлдөөнд харш үр дагавар бүхий зар сурталчилгаа явуулах;

12.1.4.бусдын бараа, бүтээгдэхүүний тэмдэг, шошго, аж ахуй эрхлэгчийн нэр, барааны чанарын баталгааг зөвшөөрөлгүй хэрэглэх, барааны оноосон нэр, баглаа боодлыг хуулбарлан ашиглах;

12.1.5.бараа, бүтээгдэхүүний чанарын доголдол болон хүний амь нас, эрүүл мэнд, хүрээлэн байгаа орчинд аюултай шинж чанарыг нуун дарагдуулах;

12.1.6.өөрийн бараа, бүтээгдэхүүнийг борлуулахдаа өрсөлдөгчийн бараа, бүтээгдэхүүнийг худалдан авахгүй байх болзол тулгах;

12.1.7.тухайн бараа, бүтээгдэхүүний борлуулалтад урамшуулал, хямдрал байгаа гэсэн хуурамч мэдээлэл түгээх, эсхүл уг урамшууллыг аль нэг этгээдэд өгөхөөр урьдчилан тохиролцож зориуд хуурамчаар зохион байгуулах;

12.1.8.уралдаант шалгаруулалт, дуудлага худалдаа, төрийн болон орон нутгийн өмчийн хөрөнгөөр бараа, ажил, үйлчилгээ худалдан авах ажиллагаанд оролцохдоо өрсөлдөгчөө тухайн үйл ажиллагааны бодит нөхцөлөөс төөрөгдүүлэх, тэдэнд дарамт, шахалт үзүүлэх;

12.1.9.бусдын хууль ёсны ашиг сонирхолд харшлах болон хэрэглэгчийг хохироох худалдааны арга хэрэглэх.

### **13 дугаар зүйл. Захиргааны байгууллагаас өрсөлдөөнийг хязгаарлахыг хориглох**

13.1.Хуулиар тусгайлан эрх олгоогүй захиргааны байгууллага аж ахуйн аливаа үйл ажиллагаа явуулахтай холбоотой зөвшөөрөл, лиценз, эрх олгох, бүртгэл явуулах, төлбөр, хураамж авахыг хориглоно.

13.2.Захиргааны байгууллага хуульд тусгайлан зааснаас бусад тохиолдолд дараахь захиргааны шийдвэр гаргах, захиргааны бусад үйл ажиллагаа явуулахыг хориглоно:

13.2.1.аж ахуй эрхлэгчийг тодорхой үйл ажиллагаа явуулах, бараа, бүтээгдэхүүн үйлдвэрлэх, борлуулахыг хориглосон буюу хязгаарласан;

13.2.2.аж ахуй эрхлэгч бараа, бүтээгдэхүүнээ нэг зах зээлээс нөгөөд борлуулахыг хориглосон буюу хязгаарласан;

13.2.3.тухайн зах зээлд өрсөлдөгч гарч ирэхийг хориглосон буюу хязгаарласан, эсхүл аж ахуй эрхлэгчийг зах зээлээс шахан гаргахад чиглэсэн;

13.2.4.бараа, бүтээгдэхүүний үнийг бууруулахад, эсхүл нэг хэмжээнд барихад чиглэсэн;

13.2.5.зах зээлийг нутаг дэвсгэр, эсхүл үйлдвэрлэл, борлуулалтын хэмжээ, барааны нэр, төрөл, худалдагч, худалдан авагчийн хүрээгээр хуваарилахад чиглэсэн;

13.2.6.аж ахуй эрхлэгчийн бараа бүтээгдэхүүнийг бусад байгууллага, аж ахуй эрхлэгчид зээлээр олгоход чиглэсэн;

13.2.7.аль нэг аж ахуй эрхлэгчид давуу байдал олгоход чиглэсэн.

13.3.Гэнэтийн буюу давагдашгүй хүчин зүйлийн улмаас учирсан хохирлыг нөхөн барагдуулах, эдийн засгийн хямралыг даван туулах, стратегийн гол бараа бүтээгдэхүүн тухайлбал, Улсын нөөцийн тухай хуульд заасны дагуу Улсын Их Хурлаас тогтоосон бараа материалын эрэлт, нийлүүлэлтийн зохистой байдлыг бүрдүүлэн хэрэглэгчийн амьжиргааны түвшний тогтвортой байдлыг хангахад зориулж Засгийн газар, түүний эрх олгосон байгууллагаас зохицуулалт хийх, зээл олгох, тусламж үзүүлэхийг өрсөлдөөнийг хязгаарласанд тооцохгүй.

13.4.Засгийн газраас нийтийн ашиг сонирхол, үндэсний аюулгүй байдлыг хангах, үр ашигтай өрсөлдөөний нөхцөлийг бүрдүүлэх үүднээс Шударга өрсөлдөөн, хэрэглэгчийн хорооны саналыг үндэслэн зарим төрлийн аж ахуйн үйл ажиллагааны тусгай зөвшөөрлийн олголтод 5 жил хүртэлх хугацаагаар хязгаарлалт хийж болно.

## ГУРАВДУГААР БҮЛЭГ

### ШУДАРГА ӨРСӨЛДӨӨН, ХЭРЭГЛЭГЧИЙН ХОРООНЫ ЭРХ ЗҮЙН БАЙДАЛ

#### 14 дүгээр зүйл. Шударга өрсөлдөөн, хэрэглэгчийн хороо

14.1.Шударга өрсөлдөөн, хэрэглэгчийн хороо /цаашид “Хороо” гэх/ нь Өрсөлдөөний тухай хууль тогтоомжийн биелэлтэд хяналт тавих, хяналт шалгалт хийх, өрсөлдөөнийг хамгаалах, зохицуулах, зах зээлийн өрсөлдөөний талаар төрөөс баримтлах бодлогыг улсын хэмжээнд хэрэгжүүлэх чиг үүрэг бүхий төрийн захиргааны байгууллага байна.

14.2.Хорооны дүрмийг Засгийн газар батална.

14.3.Хороо энэ хуульд заасан үндсэн чиг үүрэг, бүрэн эрхээ аливаа этгээдээс хараат бусаар, бие даан хэрэгжүүлнэ. Хорооны шийдвэр гаргах үйл ажиллагаанд төрийн бусад байгууллага, албан тушаалтан хөндлөнгөөс нөлөөлөх буюу нөлөөлж болзошгүй үйлдэл хийхийг хориглоно.

14.4.Хороонд улсын ерөнхий байцаагч, улсын ахлах байцаагч, улсын байцаагч, орон нутагт улсын байцаагч ажиллана.

14.5.Хорооны дарга улсын ерөнхий байцаагч байх бөгөөд ерөнхий байцаагчийн эрхийг Засгийн газар олгоно. Улсын ерөнхий байцаагч нь улсын ахлах байцаагч, улсын байцаагчийн эрхийг олгоно.

14.6.Хороо үйл ажиллагаагаа жил бүр Засгийн газарт тайлагнана.

14.7.Хорооны үйл ажиллагаатай холбоотой энэ хуулиар зохицуулснаас бусад харилцааг Засгийн газрын агентлагийн эрх зүйн байдлын тухай хууль болон холбогдох бусад хууль тогтоомжоор зохицуулна.

#### 15 дугаар зүйл. Хорооны бүрэн эрх

15.1.Хороо чиг үүргийнхээ дагуу дараахь бүрэн эрхийг хэрэгжүүлнэ:

15.1.1.өрсөлдөөний соёлыг төлөвшүүлэх, шударга бус өрсөлдөөнөөс урьдчилан сэргийлэх ажлыг зохион байгуулах хөтөлбөр боловсруулах, арга зүйн удирдлагаар хангах, хэрэгжилтэд нь хяналт тавих;

15.1.2.өрсөлдөөний нөхцөлийг бүрдүүлэх, хамгаалах зэрэг өрсөлдөөний талаар төрөөс баримтлах бодлогыг боловсруулж Засгийн газраар шийдвэрлүүлэх, уг бодлогыг хэрэгжүүлэх, төрийн бусад байгууллагаас тодорхойлон хэрэгжүүлж байгаа салбарын бодлого, үйл ажиллагаанд өрсөлдөөний бодлогыг хэрхэн тусгах талаар бие даан санал, зөвлөмж боловсруулж хүргүүлэх;

15.1.3.өрсөлдөөний тухай хууль тогтоомжийг боловсронгуй болгох талаар санал боловсруулж шийдвэрлүүлэх;

15.1.4.өрсөлдөөний тухай хууль тогтоомжийн хэрэгжилтийг хангуулах, өмчийн хэлбэр харгалзахгүйгээр аж ахуй эрхлэгч, байгууллагад хяналт шалгалт



хийх, илэрсэн зөрчлийг таслан зогсоох, мэдээлэл, баримт материал үнэ төлбөргүйгээр гаргуулан авах, дүгнэлт гаргах;

15.1.5.хяналт шалгалтын явцад илэрсэн эрхлэх асуудлын хүрээнд хамааралгүй хууль зөрчсөн бусад үйлдлийг шалгуулах, холбогдох баримт материалыг эрх бүхий байгууллагад шилжүүлэх;

15.1.6.зах зээлд зүй ёсны монополь байдалтай аж ахуй эрхлэгчийг энэ хуулийн 15.2-т заасан журмын дагуу судлан тогтоох, нийтэд зарлах, бүртгэл хөтлөх, үйл ажиллагаанд нь хуульд заасан хяналт тавих, зохицуулалт хийх;

15.1.7.Аж ахуй эрхлэгч нэгдэх, нийлэх замаар өөрчлөн байгуулагдах, бусад аж ахуй эрхлэгч хуулийн этгээдийг худалдан авах, шилжүүлэн авах талаар энэ хуульд заасан зохицуулалтыг хэрэгжүүлж, шийдвэр гаргах;

15.1.8.энэ хуулийн 15.1.6-д зааснаас бусад аж ахуй эрхлэгчийн зах зээлд эзлэх хувийг урьдчилан судлан тогтоох шаардлагагүй бөгөөд хяналт шалгалт хийх, зөрчил шалган шийдвэрлэх явцдаа тухайн жилд тухайн аж ахуй эрхлэгчийн холбогдох зах зээлд эзлэх хувь ямар байсныг болон давамгайл байдалтай байсан эсэхийг улсын байцаагчийн саналыг үндэслэн энэ хуулийн 15.2-т заасан журмын дагуу тогтоох;

15.1.9.өрсөлдөөний тухай хууль тогтоомжийг зөрчиж гаргасан захиргааны байгууллагын шийдвэрийг бүхэлд нь эсхүл холбогдох хэсгийг хүчингүй болгуулах саналыг тухайн байгууллагад өөрт нь болон дээд шатны байгууллага, албан тушаалтанд хүргүүлж шийдвэрлүүлэх;

15.1.10.аж ахуй эрхлэгч, байгууллага, албан тушаалтнаас өрсөлдөөний нөхцөлийг бүрдүүлэх, зах зээлийн байдлыг судлан тогтоох, хяналт шалгалтын ажилд шаардлагатай мэдээ, мэдээлэл, судалгаа, тайлбар, тодорхойлолт, санхүүгийн болон бусад баримт бичгийг үнэ төлбөргүй гаргуулан авах, мэргэжлийн дүгнэлт, магадлагаа гаргуулах, хуульд нийцүүлэн тодорхой үйлдэл, үйл ажиллагаа хийх, эс хийхийг даалгах, хугацаатай үүрэг, албан шаардлага өгөх;

15.1.11.өрсөлдөөний нөхцөлийг бүрдүүлэхтэй холбогдуулан гаргасан шийдвэрээ нийтэд мэдээлэх, сурталчлах;

15.1.12.мэргэжлийн хяналт шалгалтын болон бусад байгууллага, тэдгээрийн ажилтан, иргэнийг хяналт шалгалт, судалгааны, ажилд татан оролцуулах;

15.1.13.өөрийн байгууллага, албан хаагчийнхаа аюулгүй байдлыг хангах арга хэмжээ авах;

15.1.14.өрсөлдөөний тухай хууль тогтоомж, холбогдох бусад хууль тогтоомжийг зөрчсөн эсэх талаар гаргасан улсын байцаагчийн шийдвэрт болон улсын байцаагчийн бусад шийдвэр, үйл ажиллагаанд гаргасан гомдлыг хэлэлцэн шийдвэрлэх;

15.1.15.ашгийн төлөө бус хуулийн этгээд, хуулийн этгээдийн эрхгүй байгууллагыг аж ахуй эрхлэгчтэй адилтган үзэж энэ хуулийн үйлчлэлд хамруулах талаар шийдвэр гаргах;

15.1.16.аж ахуй эрхлэгчээс хийсэн тохиролцоо, харилцан ойлголцол зэрэг үйлдэл, эс үйлдлийг энэ хуулийн үйлчлэлд хамаарах хэлцэлд тооцох эсэх талаар шийдвэр гаргах;

15.1.17.хариуцах асуудлын хүрээнд хамаарах өргөдөл, гомдлыг хүлээн авч шийдвэрлэх;

15.1.18.өөрийн үйл ажиллагаанд туслалцаа үзүүлсэн гэрч, бусад этгээдийг шаардлагатай тохиолдолд цагдаагийн байгууллагын хамгаалалтад авахуулах тухай асуудлыг цагдаагийн байгууллагад тавьж шийдвэрлүүлэх;

15.1.19.өрсөлдөөний нөхцөлийг бүрдүүлэх, хяналт шалгалт хийх болон өрсөлдөөнтэй холбоотой асуудлаар гадаад улсын болон олон улсын ижил чиг үүрэгтэй байгууллагатай хамтран ажиллах, мэдээлэл солилцох;

15.1.20.эрх бүхий байгууллагаас төрийн өмчит болон төрийн өмчийн оролцоотой хуулийн этгээдийг хувьчлах талаар боловсруулсан санал, шийдвэрийн төсөлд санал өгөх;

15.1.21.улсын байцаагчийн ёс зүйн дүрмийг батлах;

15.1.22.Зөрчлийн тухай хуулийн 10.7 дугаар зүйлийн тайлбар хэсэгт заасны дагуу аж ахуй эрхлэгчид оногдуулах шийтгэлийг багасгахад баримтлах нарийвчилсан журмыг батлах.

15.2. Энэ хуулийн 15.1.6-д заасан зах зээлд зүй ёсны монополь байдалтай аж ахуй эрхлэгчийг тогтоох журам болон энэ хуулийн 15.1.8-д заасан аж ахуй эрхлэгчийн холбогдох зах зээлд эзлэх хувь болон давамгайл байдлыг тогтоох журмыг Засгийн газар тус тус батална.

## **16 дугаар зүйл. Хорооны хуралдаан**

16.1.Хорооны бүрэн эрхээ хэрэгжүүлэн шийдвэр гаргах үйл ажиллагааны үндсэн хэлбэр нь хуралдаан байна.

16.2.Хорооны хуралдаанд оролцсон гишүүдийн олонхийн саналаар шийдвэр гаргах бөгөөд хуралдаанд оролцсон гишүүдийн санал тэнцсэн тохиолдолд асуудлыг хуралдаан даргалагчийн саналаар шийдвэрлэнэ.

16.3.Хорооны шийдвэрт Хорооны дарга гарын үсэг зурна.

16.4.Хорооны хуралдаан сард нэгээс доошгүй удаа болох бөгөөд хуралдааны дэгийг Хороо өөрөө тогтооно.

16.5.Хорооны дарга, гишүүн хуралдаанаар асуудлыг нь хэлэлцэж байгаа этгээдтэй ашиг сонирхлын зөрчил үүсэхээр бол хуралдаан эхлэхээс өмнө энэ тухай мэдэгдэж, уг асуудлыг хуралдаанаар хэлэлцэх, шийдвэр гаргахад оролцохгүй.

16.6.Хорооны хуралдааныг нийт гишүүний олонх нь хүрэлцэн ирсэн бол хүчинтэйд тооцно.

16.7.Хорооны хуралдааныг гурваас доошгүй гишүүний бичгээр гаргасан хүсэлт болон Хорооны даргын шийдвэрээр энэ хуулийн 16.4-т зааснаас бусад үед зарлан хуралдуулж болно.

16.8.Хорооны хуралдаанаас гаргасан шийдвэр тогтоол хэлбэртэй байна.

16.9.Хорооны хуралдааны явцыг тэмдэглэлээр баталгаажуулах бөгөөд түүнд хуралдаанд оролцсон бүх гишүүд гарын үсэг зурна.

### **17 дугаар зүйл. Хорооны дарга, гишүүнийг томилох**

17.1.Хороо нь хамтын удирдлагын зарчмаар ажиллах бөгөөд дарга, найман гишүүний бүрэлдэхүүнтэй байна. Гишүүдийн хоёр нь орон тооны, зургаа нь орон тооны бус байх бөгөөд орон тооны хоёр гишүүн нь Хорооны дэд дарга байна.

17.2.Хорооны дарга, орон тооны хоёр гишүүнд тус бүр нэг хүний нэрийг Ерөнхий сайд, орон тооны бус зургаан гишүүнд Санхүү төсвийн асуудал эрхэлсэн Засгийн газрын гишүүн, Хууль зүйн асуудал эрхэлсэн Засгийн газрын гишүүн тус бүр өөрийн эрхлэх асуудлын хүрээний төрийн захиргааны төв байгууллагын тухайн асуудал хариуцсан нэгжийн даргаас дээш албан тушаалтай хоёр хүний, Жижиг дунд үйлдвэрлэлийн асуудал эрхэлсэн Засгийн газрын гишүүн, Уул уурхай, хүнд үйлдвэрийн асуудал эрхэлсэн Засгийн газрын гишүүн тус бүр өөрийн эрхлэх асуудлын хүрээний төрийн захиргааны төв байгууллагын тухайн асуудал хариуцсан нэгжийн даргаас дээш албан тушаалтай нэг хүний нэрийг дэвшүүлж Засгийн газраас томилно.

17.3.Хорооны дарга, гишүүнээр дараахь этгээдийг томилж болохгүй :

17.3.1.төрийн улс төрийн албан хаагч;

17.3.2.улс төрийн намын гишүүн;

17.3.3.Үндсэн хуулийн цэцийн гишүүн, бүх шатны шүүхийн шүүгч, прокурор;

17.3.4.төрийн болон хувийн өмчийн аж ахуй эрхлэгчид ажиллаж байгаа этгээд;

17.3.5.бизнесийн мэргэжлийн үйл ажиллагаа явуулдаг төрийн бус байгууллагын удирдах албан тушаалтан.

17.4.Хорооны дарга нь эдийн засаг, эрх зүйн аль нэг чиглэлээр мэргэжил эзэмшсэн, мэргэжлээрээ арван таваас доошгүй жил, үүнээс төрийн байгууллагад арваас доошгүй жил ажилласан Монгол Улсын иргэн байна.

17.5.Хорооны гишүүн нь эдийн засаг, эрх зүйн аль нэг чиглэлээр мэргэжил эзэмшсэн, мэргэжлээрээ арваас доошгүй жил, үүнээс төрийн байгууллагад наймаас доошгүй жил ажилласан Монгол Улсын иргэн байна.

17.6.Энэ хуулийн 17.2-т заасан нэр дэвшигчийг Засгийн газар дэмжээгүй бол нэр дэвшүүлэх эрх бүхий этгээд ажлын 10 өдрийн дотор өөр хүний нэрийг дэвшүүлэх бөгөөд уг саналыг хүлээн авснаас хойш Засгийн газар ажлын 15 өдрийн дотор хэлэлцэж томилно.

## **18 дугаар зүйл. Хорооны дарга, гишүүнийг үүрэгт ажлаас нь чөлөөлөх, халах**

18.1.Засгийн газар дараахь үндэслэлээр Хорооны дарга, гишүүнийг үүрэгт ажлаас нь чөлөөлнө:

18.1.1.бүрэн эрхийн хугацаа дуусгавар болсон;

18.1.2.эрүүл мэндийн байдал болон хүндэтгэн үзэх бусад шалтгаанаар албан үүргээ гүйцэтгэх боломжгүй болсон;

18.1.3.үүрэгт ажлаасаа чөлөөлүүлэхийг хүсэж өөрөө өргөдөл гаргасан;

18.1.4.энэ хуулийн 17.3-т заасан албан тушаалд томилогдсон буюу сонгогдсон.

18.2.Энэ хуулийн 18.1-д заасан үндэслэлээр Хорооны дарга, гишүүнийг үүрэгт ажлаас нь чөлөөлүүлэх тухай саналыг түүнийг томилоход нэр дэвшүүлсэн этгээд Засгийн газарт оруулна.

18.3. Засгийн газар дараахь үндэслэлээр Хорооны дарга, гишүүнийг үүрэгт ажлаас нь хална:

18.3.1.гэмт хэрэг үйлдсэнийг шүүхээс тогтоож, шүүхийн шийтгэх тогтоол хүчин төгөлдөр болсон;

18.3.2.энэ хуулийн 17.3-т заасныг зөрчсөн нь томилогдсоных нь дараа илэрсэн.

18.4.Засгийн газар энэ хуулийн 18.3.2-т заасан тохиолдолд томилуулахаар нэр дэвшүүлсэн этгээдийн саналыг, 18.3.1-д заасан тохиолдолд эрх бүхий байгууллагын шийдвэрийг тус тус үндэслэн Хорооны дарга, гишүүнийг үүрэгт ажлаас нь хална.

## **19 дүгээр зүйл. Хорооны дарга, гишүүнийг нөхөн томилох**

19.1.Хорооны дарга, гишүүний бүрэн эрхийн хугацаа хуулиар тогтоосон хугацаанаас өмнө дуусгавар болсон бол энэ хуулийн 17.2-т заасан эрх бүхий этгээд өөр хүнийг нэр дэвшүүлж, саналаа Засгийн газрын хуралдаанд оруулна.

19.2.Энэ хуулийн 19.1-д заасны дагуу томилогдсон этгээдийн бүрэн эрхийн хугацаа өмнөх гишүүний томилолтын үлдсэн хугацаатай адил байна.

19.3.Хорооны дарга, гишүүнийг томилох, чөлөөлөх, нөхөн томилохтой холбоотой энэ хуулиар зохицуулаагүй бусад харилцааг Төрийн албаны тухай хуулиар зохицуулна.

## **20 дугаар зүйл. Хорооны дарга, гишүүний бүрэн эрхийн хугацаа**

20.1.Хорооны дарга, гишүүний бүрэн эрхийн хугацаа зургаан жил байх бөгөөд нэг удаа улируулан томилж болно.

20.2.Хорооны дарга, гишүүний бүрэн эрх нь түүнийг томилсон тухай Засгийн газрын шийдвэр гарснаар эхэлж, дараагийн дарга, гишүүн томилогдсоноор дуусгавар болно.

## **21 дүгээр зүйл. Хорооны даргын бүрэн эрх**

21.1.Хорооны дарга дараахь бүрэн эрхийг хэрэгжүүлнэ:

21.1.1.Хороог дотоод, гадаад харилцаанд төлөөлөх;

21.1.2.Хорооны хуралдаанаар хэлэлцэх асуудлыг тодорхойлох, хуралдааныг товлох, гишүүний бүрэн эрхийг хэрэгжүүлж, хуралдааныг даргалах;

21.1.3.Хорооны гишүүний ажил үүргийг хуваарилж, гүйцэтгэлд нь хяналт тавих;

21.1.4.хууль тогтоомжид заасан бусад бүрэн эрх.

21.2.Хорооны даргын түр эзгүйд үүргийг нь түүний томилсны дагуу Хорооны орон тооны аль нэг гишүүн гүйцэтгэнэ.

## **22 дугаар зүйл. Улсын байцаагчийн эрх, үүрэг**

22.1.Энэ хуульд заасан улсын ерөнхий байцаагч, улсын ахлах байцаагч, улсын байцаагч нь Хорооноос баталсан албаны болон хувийн дугаар бүхий үнэмлэх, тэмдэг, хэвлэмэл хуудас хэрэглэнэ.

22.2.Улсын байцаагч нь Төрийн хяналт шалгалтын тухай хуулийн 10 дугаар зүйлд заасан нийтлэг бүрэн эрхийг хэрэгжүүлж, мөн хуулийн 11 дүгээр зүйлд заасан баталгаагаар хангагдахаас гадна энэ хуульд заасан эрх, үүргийг хэрэгжүүлж, холбогдох баталгаагаар хангагдана.

22.3.Улсын байцаагч дараахь эрх, үүргийг хэрэгжүүлнэ:

22.3.1.өрсөлдөөний тухай хууль тогтоомжийн хэрэгжилтэд хяналт тавих, хяналт шалгалт хийх саналаа Хорооны удирдлагад тавьж шийдвэрлүүлэх, хяналт шалгалт хийх;

22.3.2. аж ахуй эрхлэгчийн холбогдох зах зээлд эзлэх хувь ямар байсныг болон давамгайл байдалтай байсан эсэхийг судлан Хороонд танилцуулж холбогдох шийдвэрийг гаргуулах;

22.3.3.судалгаа, хяналт шалгалтын ажилд шаардлагатай мэдээ, мэдээлэл, тайлан, тайлбар, тодорхойлолт, бусад баримт бичгийг холбогдох байгууллага, албан тушаалтан, аж ахуй эрхлэгчээс үнэ төлбөргүй гаргуулан авах;

22.3.4.хийсэн хяналт шалгалт, гаргасан шийдвэрийнхээ үнэн зөвийг бүрэн хариуцах;

22.3.5.хяналт шалгалтын явцад нотлох баримт олох, хяналт шалгалтын ажилд ач холбогдол бүхий бусад байдлыг тодруулах зорилгоор шалгагдаж байгаа этгээдийн бие, албан тасалгаа, үйлдвэрийн газар, агуулах болон бичиг баримт, компьютер, эд зүйлд үзлэг хийх, шаардлагатай баримт материал, эд зүйлийг түр хураан авах;

22.3.6.Өрсөлдөөний тухай хууль тогтоомж зөрчсөн нь тогтоогдсон аж ахуй эрхлэгчид Зөрчлийн тухай хуульд заасан шийтгэл оногдуулах, шийтгэлээс чөлөөлөх;

22.3.7.шийтгэл оногдуулах тухай өөрийн гаргасан шийдвэрийн биелэлтийг хангуулах;

22.3.8.өөрийн болон гэр бүлийн гишүүний амь нас, эрүүл мэнд, өмч хөрөнгөд нь шууд тулгарсан гэнэтийн халдлагын аюулаас хамгаалахын тулд бие хамгаалах тусгай хэрэгслийг энэ хуулийн 22.4-т заасан журмын дагуу хэрэглэх;

22.3.9.хяналт шалгалтын явцад холбогдох этгээдийг мэдэгдэх хуудсаар дуудан ирүүлэх;

22.3.10.хяналт шалгалт хийх явцдаа хяналт шалгалтын ажилд шаардлагатай мэдээ, мэдээлэл, тайлбар, баримт бичиг гаргуулан авах, хуульд нийцүүлэн холбогдох үйлдэл, үйл ажиллагааг хийлгүүлэхээр аж ахуй эрхлэгч, бусад байгууллагад албан шаардлага хүргүүлэх, албан шаардлагыг тогтоосон хугацаанд биелүүлэхийг шаардах;

22.3.11.хяналт шалгалт хийх явцдаа олж авсан мэдээ, мэдээлэл, тайлбар, баримт бичгийг бусдад дамжуулах, мэдээлэхийг хориглох;

22.3.12.Улсын байцаагч бүрэн эрхээ хэрэгжүүлэхдээ бусдын нөлөөнд үл автан гагцхүү хууль тогтоомж болон түүнд нийцүүлэн гаргасан эрх зүйн бусад актыг удирдлага болгон ажиллах;

22.3.13.Зөрчлийн тухай хуульд заасан зөрчлийг шалган шийдвэрлэх, Зөрчил шалган шийдвэрлэх тухай хууль болон холбогдох бусад хууль тогтоомжид заасан бүрэн эрхийг хэрэгжүүлэх.

22.4. Энэ хуулийн 22.3.8-д заасан тусгай хэрэгслийн жагсаалт, түүнийг хэрэглэх журмыг шударга өрсөлдөөнийг дэмжих, хянан зохицуулах асуудал эрхэлсэн Засгийн газрын гишүүн, Улсын Ерөнхий прокурортой хамтран батална.

## **23 дугаар зүйл. Хорооны дарга, гишүүн, албан хаагчийн баталгаа**

23.1.Хорооны дарга, гишүүн албан хаагч төрийн албаны тухай хууль тогтоомжид заасан төрийн албан хаагчийн ажиллах нөхцөл, баталгаа, түүнд олгох цалин хөлс, нөхөн төлбөр, тусламж, шагнал, урамшил, тэтгэвэр, тэтгэмжээс гадна дор дурдсан нэмэгдэл баталгаагаар хангагдана:

23.1.1.Энэ хуулийн 18 дугаар зүйлд зааснаас бусад тохиолдолд Хорооны дарга, гишүүнийг үүрэгт ажлаас нь чөлөөлөх, халахыг хориглоно. Хорооны орон тооны бус гишүүнд урамшуулал олгох журам, урамшууллын хэмжээг Хорооны дүрэмд зааснаар зохицуулах;

23.1.2.Хорооны дарга, гишүүн, албан хаагч албан үүргээ гүйцэтгэж байхдаа хөдөлмөрийн чадвараа түр алдсан буюу хөгжлийн бэрхшээлтэй болсон бол Төрийн албаны тухай хуулийн 59 дүгээр зүйлд заасны дагуу зохицуулах;

23.1.3.Хорооны дарга, гишүүн, албан хаагч албан үүргээ гүйцэтгэж байхдаа амь насаа алдсан эсхүл албан үүрэгтэй нь холбогдуулан амь насыг нь хохироосон бол Төрийн албаны тухай хуулийн 60 дугаар зүйлд заасны дагуу зохицуулах;

23.1.4.Хорооны дарга, гишүүн, улсын байцаагч, түүнтэй адилтгах албан хаагчийн амь нас, эрүүл мэндийг гэнэтийн аюул, осол аваар, халдлагаас хамгаалж заавал даатгах бөгөөд даатгалын төлбөрийг Хорооны төсвөөс төлөх;

23.1.5.Хорооны дарга, гишүүн, албан хаагчийн албаны болон хяналт шалгалт хийх бүрэн эрхээ хэрэгжүүлэхэд нь зайлшгүй шаардагдах зардлыг Хорооны төсвөөс олгох.

23.2.Энэ хуульд заасан эдийн засгийн баталгааг Хорооны дарга, гишүүн, албан хаагчид эдлүүлэхдээ ижил төрлийн тэтгэвэр, тэтгэмж, тусламж, нэмэгдлийг давхардуулж олгохгүй бөгөөд сонголтыг тухайн албан хаагч өөрөө хийнэ.

23.3.Албан хаагч эрх бүхий албан тушаалтны өгсөн тушаал, даалгаврыг шууд биелүүлснээс үүссэн хохирол, сөрөг үр дагаврыг тушаал, даалгавар өгсөн албан тушаалтан хариуцна.

## **ДӨРӨВДҮГЭЭР БҮЛЭГ**

### **ХЯНАЛТ ШАЛГАЛТ**

#### **24 дүгээр зүйл. Хяналт шалгалт хийх үндэслэл**

24.1.Хорооны улсын байцаагч энэ хуульд заасан өөрийн бүрэн эрхэд хамаарах асуудлаар байнгын хяналт тавих бөгөөд төлөвлөгөөт болон төлөвлөгөөт бус хяналт шалгалтыг дараахь үндэслэлээр зохион байгуулна:

24.1.1.аж ахуй эрхлэгч, байгууллага, иргэнээс ирүүлсэн өргөдөл гомдол;

24.1.2.хэвлэл мэдээллийн хэрэгсэл болон бусад байдлаар мэдээлэгдсэн мэдээлэл;

24.1.3.эрх бүхий байгууллагын шийдвэрээр болон өөрийн санаачилгаар;

24.1.4.хуульд заасан бусад үндэслэл.

#### **25 дугаар зүйл. Хяналт шалгалт хийх**

25.1.Улсын байцаагч төлөвлөгөөт болон төлөвлөгөөт бус хяналт шалгалтын ажиллагааг ажлын 60 хоногийн дотор явуулна.

25.2.Энэ хуулийн 25.1-д заасан хугацаанд хяналт шалгалтын ажиллагааг дуусгах боломжгүй бол уг хугацааг Хорооны дарга ажлын 30 хүртэл хоногоор сунгаж болно.

25.3.Улсын байцаагч хяналт шалгалтын дүгнэлт, танилцуулгаа уг ажиллагааг хийж дууссанаас хойш ажлын 10 өдрийн дотор Хорооны даргад танилцуулна.

25.4.Улсын байцаагч хяналт шалгалт хийхдээ хяналт шалгалтын тэмдэглэл хөтлөх, үзлэг хийх, шаардлагатай гэж үзсэн эд зүйл, баримт бичгийг түр хураан авах эрхээ хэрэгжүүлэхдээ заавал тэмдэглэл хөтлөх бөгөөд энэ ажиллагааг явуулахдаа холбогдох хууль тогтоомжид заасан журмыг баримтална.

25.5.Өрсөлдөөний тухай хууль тогтоомжийн биелэлтийг шалгаж эцсийн шийдвэр гаргаагүй байхад аж ахуй эрхлэгчийн нэр хүндэд харш аливаа мэдээ, мэдээлэл тараахыг хориглоно.

25.6.Энэ хуулийн 25.5-д заасныг зөрчсөний улмаас аж ахуй эрхлэгч ажил хэргийн нэр хүнд, бизнесийн ашиг орлогод нөлөөлж гэм хор учирсан гэж гомдол гаргавал Хороо асуудлыг хэлэлцэж гэм буруутай этгээдэд хуулийн дагуу хариуцлага хүлээлгэж, нийтэд мэдээлэх замаар аж ахуй эрхлэгчийн зөрчигдсөн эрхийг сэргээх арга хэмжээ авна.

## **26 дугаар зүйл. Хяналт шалгалтын ажиллагаанд дэмжлэг үзүүлэх**

26.1.Хороо, улсын байцаагчийн хуулиар олгогдсон бүрэн эрхийн хүрээнд хэрэгжүүлж байгаа хяналт шалгалтын ажиллагаанд төрийн бүх шатны байгууллага, албан тушаалтан шаардлагатай туслалцаа, дэмжлэг үзүүлж, уг ажиллагааг явуулах бололцоогоор хангаж ажиллах үүрэгтэй.

26.2.Хорооны дарга, гишүүн, албан хаагч хуулиар хүлээсэн үүргээ хэрэгжүүлэхтэй нь холбогдуулан өөрт нь болон түүний гэр бүлийн гишүүний амь нас, эрүүл мэнд, эд хөрөнгөд бодит аюул заналхийлсэн тохиолдолд тэдний аюулгүй байдлыг цагдаагийн байгууллага хангана.

## **27 дугаар зүйл. Гомдол гаргах, шийдвэрлэх**

27.1.Энэ хуульд заасан улсын байцаагчийн шийтгэл оногдуулах талаар гаргасан шийдвэр, зөрчил шалган шийдвэрлэх ажиллагаатай холбоотой болон хяналт шалгалтын ажиллагаатай холбоотой гаргасан шийдвэр, үйл ажиллагааг хууль бус гэж үзсэн этгээд холбогдох шийдвэрийг хүлээн авснаас, эсхүл мэдсэнээс хойш 30 хоногийн дотор Хороонд гомдлоо гаргаж болно.

27.2.Энэ хуулийн 27.1-д заасан гомдлыг Хороо хүлээн авснаас хойш 30 хоногийн дотор хуралдаанаараа хэлэлцэн шийдвэрлэнэ. Хороо гомдлыг хэлэлцэн шийдвэрлэхэд нэмэлт тодруулах зүйл байна гэж үзвэл, эсхүл гомдол гаргагчийн хүсэлтээр уг хугацааг 60 хүртэл хоногоор сунгаж болно.



27.3.Хороо энэ хуулийн 27.1-д заасан гомдлыг хэлэлцэн шийдвэрлэхэд чухал ач холбогдолтой гэж үзвэл холбогдох этгээдийг гомдол хэлэлцэн шийдвэрлэх хуралдаанд оролцуулж болно. Оролцох этгээд хуралдаанд заавал хүрэлцэн ирэх үүрэгтэй бөгөөд хүндэтгэн үзэх шалтгааны улмаас хуралдаанд оролцох боломжгүй бол бичгээр тайлбар өгч болно.

27.4.Хороо шаардлагатай гэж үзвэл гомдлыг хэлэлцэн шийдвэрлэх хүртэлх хугацаанд улсын байцаагчийн шийдвэрийн биелэлтийг түдгэлзүүлж болно.

27.5.Хороо энэ хуулийн 27.1-д заасан гомдлыг хэлэлцээд дараахь шийдвэрийн аль нэгийг гаргана:

27.5.1.улсын байцаагчийн гаргасан шийдвэрийг хэвээр үлдээх, хэрэгжүүлсэн үйл ажиллагааг хууль зөрчөөгүйд тооцох;

27.5.2.улсын байцаагчийн гаргасан шийдвэр, хэрэгжүүлсэн үйл ажиллагааг хуульд нийцүүлэн өөрчлөх;

27.5.3.улсын байцаагчийн гаргасан шийдвэр, хэрэгжүүлсэн үйл ажиллагаа хууль бус болох нь тогтоогдвол хүчингүй болгох.

27.6.Хорооны гаргасан шийдвэрийг хууль бус гэж үзсэн этгээд холбогдох шийдвэрийг хүлээн авснаас, эсхүл мэдсэнээс хойш 30 хоногийн дотор шүүхэд гомдол гаргаж болно.

27.7.Өрсөлдөөний тухай хууль тогтоомжтой холбогдуулан хийх хяналт шалгалтын харилцаатай холбоотой энэ хуулиар зохицуулаагүй бусад харилцааг Төрийн хяналт шалгалтын тухай хуулиар зохицуулна.

## **ТАВДУГААР БҮЛЭГ**

### **БУСАД ЗҮЙЛ**

#### **28 дугаар зүйл. Аж ахуй эрхлэгч, байгууллага, албан тушаалтны үүрэг**

28.1.Аж ахуй эрхлэгч, захиргааны байгууллага, албан тушаалтан дараахь үүрэгтэй:

28.1.1.Хороо, улсын байцаагчийн гаргасан хууль ёсны шийдвэрийг тогтоосон хугацаанд заавал биелүүлэх;

28.1.2.өрсөлдөөний нөхцөлийг бүрдүүлэх, зах зээлийн байдлыг судлах болон хяналт шалгалтын ажилд шаардлагатай мэдээ, мэдээлэл, баримт материалыг тогтоосон хугацаанд үнэ төлбөргүй, үнэн зөв гаргаж өгөх.

#### **29 дүгээр зүйл. Хөөн хэлэлцэх хугацаа**

29.1.Өрсөлдөөний тухай хуулийг зөрчсөн зөрчил үйлдэгдсэн өдрөөс, зөрчил үргэлжилсэн буюу давтан үйлдэгдсэн тохиолдолд сүүлийн зөрчил үйлдэгдсэн өдрөөс хойш 3 жил өнгөрсөн бол зөрчил шалган шийдвэрлэх ажиллагаа явуулахгүй.

#### **30 дугаар зүйл. Хууль зөрчигчид хүлээлгэх хариуцлага**

30.1.Энэ хуулийг зөрчсөн захиргааны байгууллагын албан тушаалтны үйлдэл нь гэмт хэргийн шинжгүй бол Зөрчлийн тухай хууль, Төрийн албаны тухай хуульд заасан хариуцлага хүлээлгэнэ.

30.2.Энэ хуулийг зөрчсөн аж ахуй эрхлэгчид Эрүүгийн болон Зөрчлийн тухай хуульд заасан хариуцлага хүлээлгэнэ.

---

### **31 дүгээр зүйл. Хууль хүчин төгөлдөр болох**

31.1.Энэ хуулийг 2019... оны ... дугаар сарын ... -ны өдрөөс эхлэн дагаж мөрдөнө.

### **ГАРЫН ҮСЭГ**

**МОНГОЛ УЛСЫН ХУУЛЬ**

2019 оны ... дүгээр  
сарын ...-ний өдөр

Улаанбаатар хот

**ЗӨРЧИЛ ШАЛГАН ШИЙДВЭРЛЭХ ТУХАЙ  
ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ**

**1 дүгээр зүйл.** Зөрчил шалган шийдвэрлэх тухай хуулийн 1.8 дугаар зүйлийн 6.16 дахь хэсгийн “төлөө газрын” гэснийг “хорооны” гэж өөрчилсүгэй.

**2 дугаар зүйл.** Энэ хуулийг Өрсөлдөөний тухай хууль /Шинэчилсэн найруулга/ хүчин төгөлдөр болсон өдрөөс эхлэн дагаж мөрдөнө.

**ГАРЫН ҮСЭГ**

**МОНГОЛ УЛСЫН ХУУЛЬ**

2019 оны ... дүгээр  
сарын ...-ний өдөр

Улаанбаатар  
хот

**ЗӨРЧЛИЙН ТУХАЙ ХУУЛЬД НЭМЭЛТ,  
ӨӨРЧЛӨЛТ ОРУУЛАХ ТУХАЙ ХУУЛЬ.**

**1 дүгээр зүйл.** Зөрчлийн тухай хуулийн 10.7 дугаар зүйлд дор дурдсан агуулгатай дараахь заалт нэмсүгэй.

**1/ 10.7 дугаар зүйлийн 1 дэх хэсгийн 1.3 дахь заалт:**

“1.3. уралдаант шалгаруулалт, дуудлага худалдаа, төрийн болон орон нутгийн өмчийн хөрөнгөөр бараа, ажил, үйлчилгээ худалдан авах ажиллагаанд оролцохдоо бараа, бүтээгдэхүүний үнэ, болон бусад нөхцөл, шалгуурыг урьдчилан тохиролцох;”

**2/ 10.7 дугаар зүйлийн 4 дэх хэсгийн 4.7, 4.8 дахь заалт:**

“4.7. өрсөлдөөнд харш үр дагавар бүхий зар сурталчилгаа явуулах;”

“4.8. бусдын бараа, бүтээгдэхүүний тэмдэг, шошго, аж ахуй эрхлэгчийн нэр, барааны чанарын баталгааг зөвшөөрөлгүй хэрэглэх, барааны оноосон нэр, баглаа боодлыг хуулбарлан ашиглах;”

**2 дугаар зүйл.** Зөрчлийн тухай хуулийн 10.7 дугаар зүйлийн 1 дэх хэсгийн 1.1 дэх заалтын “үнийг” гэсний дараа “ямар нэг хэлбэрээр” гэж, 2 дахь хэсгийн 2.1 дэх заалтын “эдийн засгийн” гэсний урд “хууль” гэж, 2.2 дахь заалтын “бараа” гэсний дараа “бүтээгдэхүүн” гэж, 4 дэх хэсгийн 4.1 дэх заалтын “өрсөлдөгчийн” гэсний дараа “болон” гэж, “зөрүүтэй” гэсний дараа “буюу” гэж, 4.3 дахь хэсгийн “чанарын” гэсний урд “бүтээгдэхүүний” гэж, “доголдол” гэсний дараа “болон” гэж нэмсүгэй.

**3 дугаар зүйл.** Зөрчлийн тухай хуулийн 10.7 дугаар зүйлийн дараах хэсгийг доор дурдсанаар өөрчлөн найруулсугай.

**1/ 10.7 дугаар зүйлийн 7 дахь хэсэг:**

7. Аж ахуй эрхлэгч бусад аж ахуй эрхлэгчтэй нэгдэх, нийлэх замаар өөрчлөн байгуулагдах, бусад аж ахуй эрхлэгч хуулийн этгээдийн хувьцааг худалдан авах эсхүл бусад хэлбэрээр шилжүүлэн авахдаа хуульд заасан тохиолдолд Шударга өрсөлдөөн, хэрэглэгчийн хорооноос урьдчилан зөвшөөрөл аваагүй бол хүнийг

дөрвөн мянган нэгжтэй тэнцэх хэмжээний төгрөгөөр, хуулийн этгээдийг дөчин мянган нэгжтэй тэнцэх хэмжээний төгрөгөөр торгоно.

**4 дүгээр зүйл.** Зөрчлийн тухай хуулийн 10.7 дугаар зүйлийн 1 дэх хэсгийн 1.3 дахь заалтын дугаарыг "1.4" гэж, 2 дахь хэсгийн 2.2 дахь заалтын "барааг" гэснийг "бараа" гэж, 2.3 дахь заалтын "хамсан" гэснийг "хамтран" гэж, 4 дэх хэсгийн 4.3 дахь заалтын "барааны" гэснийг "бараа" гэж, 4.5 хэсгийн "урьдаас" гэснийг "урьдчилан" гэж, 4.6 дахь хэсгийн "эсхүл" гэснийг "болон" гэж, 4.7 дахь заалтын дугаарыг "4.9" гэж, 5 дахь хэсгийн "холбогдох байгууллагад" гэснийг "Шударга өрсөлдөөн, хэрэглэгчийн хороонд" гэж, 9 дахь хэсгийн "хуулийн этгээдийг" гэснийг "аж ахуй эрхлэгчийг" гэж тус тус өөрчилсүгэй.

**5 дугаар зүйл.** Зөрчлийн тухай хуулийн 10.7 дугаар зүйлийн 1, 4 дэх хэсгийн "өрсөлдөөнийг хязгаарлахад чиглэсэн" гэснийг, 1.3, 2.4 дэх заалт, 3 дахь хэсгийн "тухайн бараа бүтээгдэхүүний", "хүртэл" гэснийг, 1.3 дахь заалт, 3 дахь хэсгийн "/картель/" гэснийг, 4 дэх хэсгийн 4.1 дэх заалтын "эсхүл" гэснийг, 4.7 дахь заалтын "хууль бусаар" гэснийг, 5, 8, 9 дэх хэсгийн "бараа бүтээгдэхүүний" гэснийг, 9 дэх хэсгийн "хууль бусаар", "ноёлох" гэснийг тус тус хассугай.

**6 дугаар зүйл.** Энэ хуулийг Өрсөлдөөний тухай хууль /Шинэчилсэн найруулга/ хүчин төгөлдөр болсон өдрөөс эхлэн дагаж мөрдөнө.

## ГАРЫН ҮСЭГ

МОНГОЛ УЛСЫН ХУУЛЬ

2019 оны ... дугаар  
сарын ... -ний өдөр

Улаанбаатар  
хот

**БАНКНЫ ТУХАЙ ХУУЛЬД НЭМЭЛТ  
ОРУУЛАХ ТУХАЙ**

**1 дүгээр зүйл.** Банкны тухай хуулийн 7.2 дахь хэсэгт дор дурдсан агуулгатай 7.2.10 дахь заалт нэмсүгэй.

**1/ 7.2.10 дахь заалт:**

“7.2.10. Банк нь сайн дураар шаардлагатай мэдээлэл гаргаж өгөх боломжгүй тухай мэдэгдсэнээр Өрсөлдөөний асуудал эрхэлсэн төрийн байгууллага мэдээлэл гаргуулах тухай тогтоол гаргасан.”

**2 дугаар зүйл.** Энэ хуулийг Өрсөлдөөний тухай хууль (шинэчилсэн найруулга) хүчин төгөлдөр болсон өдрөөс дагаж мөрдөнө.

ГАРЫН ҮСЭГ

МОНГОЛ УЛСЫН ХУУЛЬ

2019 оны ... дугаар  
сарын ... -ний өдөр

Улаанбаатар  
хот

**ТӨРИЙН ХЯНАЛТ ШАЛГАЛТЫН ТУХАЙ  
ХУУЛЬД НЭМЭЛТ ОРУУЛАХ ТУХАЙ**

**1 дүгээр зүйл.** Төрийн хяналт шалгалтын тухай хуулийн 3 дугаар зүйлийн 3.2 дахь хэсгийн “прокурорын хяналт” гэсний дараа “өрсөлдөөний хяналт, зохицуулалт” гэж нэмсүгэй.

**2 дугаар зүйл.** Энэ хуулийг Өрсөлдөөний тухай хууль (шинэчилсэн найруулга) хүчин төгөлдөр болсон өдрөөс дагаж мөрдөнө.

ГАРЫН ҮСЭГ

**МОНГОЛ УЛСЫН ХУУЛЬ**

2019 оны ... дугаар  
сарын ... -ний өдөр

Улаанбаатар  
хот

**КОМПАНИЙН ТУХАЙ ХУУЛЬД НЭМЭЛТ  
ОРУУЛАХ ТУХАЙ**

**1 дүгээр зүйл.** Компанийн тухай хууль /шинэчилсэн найруулга/-ийн 17.3 дахь хэсэгт дор дурдсан агуулгатай 17.3.5, 17.3.6 дахь заалт нэмсүгэй:

**1/ 17.3.5, 17.3.6 дахь заалт:**

"17.3.5. Компанийг нийлүүлэх, нэгтгэхтэй холбоотойгоор улсын бүртгэлд өөрчлөлт орох тохиолдолд Өрсөлдөөний асуудал эрхэлсэн төрийн байгууллагаас зөвшөөрсөн дүгнэлт"

"17.3.6. Компани өөр компанийн хувьцааг худалдан авсан эсхүл бусад хэлбэрээр шилжүүлэн авсаны үр дүнд тэрхүү компанийн хяналтын багцыг дангаар буюу нэгдмэл сонирхолтой этгээдийн хамт эзэмших, эсхүл дангаар буюу нэгдмэл сонирхолтой этгээдийн хамт хамгийн их энгийн хувьцаа эзэмших тохиолдолд Өрсөлдөөний асуудал эрхэлсэн төрийн байгууллагаас зөвшөөрсөн дүгнэлт"

**2 дугаар зүйл.** Энэ хуулийг Өрсөлдөөний тухай хууль (шинэчилсэн найруулга) хүчин төгөлдөр болсон өдрөөс дагаж мөрдөнө.

**ГАРЫН ҮСЭГ**



МОНГОЛ УЛСЫН ХУУЛЬ

2019 оны ... дугаар  
сарын ... -ний өдөр

Улаанбаатар  
хот

**АЖ АХУЙН ҮЙЛ АЖИЛЛАГААНЫ ТУСГАЙ ЗӨВШӨӨРЛИЙН ТУХАЙ  
ХУУЛЬД НЭМЭЛТ ОРУУЛАХ ТУХАЙ**

**1 дүгээр зүйл.** Аж ахуйн үйл ажиллагааны тусгай зөвшөөрлийн тухай хуулийн 9.1.2 дахь заалтын “таатай орчныг бүрдүүлэх” гэсний дараа “, өрсөлдөөнд харш аливаа үйл ажиллагаанаас урьдчилан сэргийлэх” гэж нэмсүгэй.

**2 дугаар зүйл.** Энэ хуулийг Өрсөлдөөний тухай хууль (шинэчилсэн найруулга) хүчин төгөлдөр болсон өдрөөс дагаж мөрдөнө.

ГАРЫН ҮСЭГ

**МОНГОЛ УЛСЫН ХУУЛЬ**

2019 оны ... дугаар  
сарын ... -ний өдөр

Улаанбаатар  
хот

**ХУУЛИЙН ЭТГЭЭДИЙН УЛСЫН БҮРТГЭЛИЙН ТУХАЙ /ШИНЭЧИЛСЭН  
НАЙРУУЛГА/ ХУУЛЬД НЭМЭЛТ ОРУУЛАХ ТУХАЙ**

**1 дүгээр зүйл.** Хуулийн этгээдийн улсын бүртгэлийн тухай /шинэчилсэн найруулга/ хуулийн 22 дугаар зүйлд дор дурдсан агуулгатай 22.5 дахь хэсэг, 22.5.1 дэх заалт тус тус нэмсүгэй.

**1/ 22.5 дахь хэсэг:**

“22.5. Хуулийн этгээд бусад хуулийн этгээдийн хувьцааг худалдан авсан эсхүл бусад хэлбэрээр шилжүүлэн авсантай холбоотой өөрчлөлтийг улсын бүртгэлд бүртгэхэд дараахь тохиолдолд Өрсөлдөөний асуудал эрхэлсэн төрийн байгууллагаас зөвшөөрсөн дүгнэлт гаргуулсан байна.”

**2/ 22.5.1 дэх заалт:**

“23.5.1. Хуулийн этгээд бусад хуулийн этгээдийн хувьцаа худалдан авсан эсхүл бусад хэлбэрээр шилжүүлэн авсаны үр дүнд Компанийн тухай хуульд заасан хяналтын багцыг эзэмших, эсхүл дангаар болон нэгдмэл сонирхолтой этгээдийн хамт хамгийн их энгийн хувьцаа эзэмших, тохиолдолд.”

**2 дугаар зүйл.** Энэ хуулийг Өрсөлдөөний тухай хууль (шинэчилсэн найруулга) хүчин төгөлдөр болсон өдрөөс дагаж мөрдөнө.

**ГАРЫН ҮСЭГ**

**МОНГОЛ УЛСЫН ХУУЛЬ**

2019 оны ... дугаар  
сарын ... -ний өдөр

Улаанбаатар  
хот

**ӨРСӨЛДӨӨНИЙ ТУХАЙ ХУУЛЬ (ШИНЭЧИЛСЭН НАЙРУУЛГА)  
ХҮЧИНГҮЙ БОЛСОНД ТООЦОХ ТУХАЙ**

**1 дүгээр зүйл.** 2010 оны 06 дугаар сарын 10-ны өдөр баталсан Өрсөлдөөний тухай хууль (шинэчилсэн найруулга)-ийг хүчингүй болсонд тооцсугай.

**2 дугаар зүйл.** Энэ хуулийг Өрсөлдөөний тухай хууль (шинэчилсэн найруулга) хүчин төгөлдөр болсон өдрөөс эхлэн дагаж мөрдөнө.

**ГАРЫН ҮСЭГ**

**МОНГОЛ УЛСЫН ИХ ХУРЛЫН ТОГТООЛ**

2019 оны ... дугаар сарын ...-ний өдөр

Төрийн ордон, Улаанбаатар хот

**Тогтоолын хавсралтад өөрчлөлт оруулах тухай**

Монгол Улсын Засгийн газрын тухай хуулийн 12 дугаар зүйлийн 1 дэх хэсгийг үндэслэн Монгол Улсын Их Хурлаас ТОГТООХ нь:

1. “Төрийн захиргааны байгууллагын тогтолцоо, бүтцийн ерөнхий бүдүүвчийг шинэчлэн батлах тухай” Улсын Их Хурлын 2016 оны 07 дугаар сарын 21-ний өдрийн 12 дугаар тогтоолын хавсралтаар баталсан “Төрийн захиргааны байгууллагын тогтолцоо, бүтцийн ерөнхий бүдүүвч”-ийн Монгол Улсын Шадар сайдын эрхлэх асуудлын хүрээний “Засгийн газрын тохируулагч агентлаг” хэсгийн 6-д “Шударга өрсөлдөөн, хэрэглэгчийн төлөө газар” гэснийг “Шударга өрсөлдөөн, хэрэглэгчийн хороо” гэж өөрчилсүгэй.

2. Энэ тогтоолыг 2019 оны ... дугаар сарын ....-ний өдрөөс эхлэн дагаж мөрдсүгэй.

**ГАРЫН ҮСЭГ**